

Inconveniencia den centro di Playa pronto lo cambia den conveniencia

Trabaonan den Centro di Oranjestad bayendo den sinergia



ORANJESTAD — Varios ekipo di trahadornan staciona na diferente puntonan di Caya Grandi ta trahando den un sinergia cu ta bisto pa tur canando eynan. E siman aki, acceso na e area na cuminsamento di caya principal di Playa a worde cera pa motibo di e trabaonan relaciona cu e infraestructura di rails pa e tram. Hopi no por mira e trabaonan andando, pero por ta sigur cu e trabaonan ta grandi, efectivo y bayendo 'biento en popa'.

Haci un recorrido for di Plaza Daniel Leo pa Plaza Comercio y ta topa cu trahadornan realizando diferente actividad similar na un 'assembly line'. Cu esaki kier men cu ekiponan ta trahando un tras di otro y mientras esun dilanti ta welder e piezanan di rails, esun su tras ta bora pa e siguiente bin schroef e railnan.

Combersando cu algun di e trahadornan na e lugar, nan a comenta cu ta miles y miles di buraco mester worde traha pa pone e bolts na ambos banda di e rails. Nan tin un racion pa cumpli cu ne di 240 pa dia, pero tin biaha nan ta sobrepasa 300. Supervisornan tambe por worde mira controlando

si e trabaonan ta bay manera mester ta.

E siman aki mes e departamentonan encarga a tene un reunion cu e Comision Permanente di Parlamento y MAMBO na unda a sali na cla cu apesar di obstaculonan chikito, cu ta normal durante cualkier proyecto di e magnitud aki, tin tur certeza cu ta canando bon y cu lo keda cla pa mitar di december proximo. A confirma cu pronto e fase di embeyecimento di caya ta cuminsa y lo traha den dos shift pa garantisa cu ta keda cla na tempo y ta cumpli cu e promesa haci.

Gabinete Mike Eman tin tur atencion pa e incomodidad cu esaki por causa no solamente pa comerciantenan di e area, pero tambe pa automobilista y publico en general. Pero no mester perde for di bista e meta final cu ta uno cu lo beneficia e centro di ciudad en general enormemente. Aruba ta habri 2013 cu un centro di ciudad bunita, cu acceso facil y transporte pa turista y local; sin laga afo un sistema di tram cu lo ta e envidia den henter Caribe.

